

Sèn Jan/San Giovanni di Fassa, ai 29 de setember 2022

COMUNICAT STAMPA

En domenia ai 9 de otober 2022

DO L VIÈL DEL SAER – *Lis dal Vera vel te dir vèlch*

Na vijita teatralisèda en onor de Lis dal Vera. En domenia ai 9 de otober, sal Vera, ta Penia, la Majon di Fascegn recorda na femena simbol e testamonech de la storia de Fascia, a na vida scempia, neva e originèla.

Ence chest an la **Majon di Fascegn** à volù endrezèr n toch de teater dedicà a n personaje de Fascia: **“Lis dal Vera”**.

L’idea de meter a jir vigni an sun paladina la storia de n personaje de Fascia la é nasciuda l an passà aldò del bon ejit del spetacol dedicà a Pèr Frumenzi Ghetta de Martin.

Alberta Rossi, responsabola de la biblioteca spezialistica del Istitut, sotrissea che **«Lis dal Vera** pel esser conscidràda l simbol de la femenes fascènes fortes e gaertes del passà e che contèr sia storia l é desche contèr chela de n muie de femenes de Fascia e da mont, leèdes a la natura, a la familia e a sia comunanza, ma ence avertes ai tempes che muda e verties a azetèr con forza e voa de viver chel che la vita ge sporc».

La raprezentazion **“DO L VIÈL DEL SAER – Lis dal Vera vel te dir vèlch”** la vegnarà portèda dant en domenia ai 9 de otober sal Vera, ta Penia te doi apuntaments, **da la does e da mesa les cinch domarena**, acioche posse tor pèrt più jent. N teater itinerant deldut originèl portà dant apede cèsa de Lis, olache ela à vivù e lurà, visavì a la marevea de Vernel. Na storia che ge dèsc valor al lengaz, a la cultura, a l’identità e a la tradizions ladines e che met en esser la miscion de la Majon di Fascegn de stravarèr chisc valores e de i portèr inant.

L’autora e regista del toch de teater l é Ilaria Chiocchetti, da Moena: «La raprezentazion la é spartida te desvalives chèdres, olache vegn portà dant i fac più emportanc de la vita de Lis. L **spetator fèsc n viac tel passà, ma ge vegn portà dant n messaje emportant per anchecondì**. Belapontin, anter i protagonisc, l é ence dei joegn che i rejonan con Lis doventan simbolicamenter ritadins de n patrimoniè culturèl, etnografich e uman de gran valuta. Per scriver l test é durà la documentazion de archivie del Istitut cultural ladin, soraldut la intervistes a Lis fates ti egn '80 e é ence abù la bela colaborazion de la fies de Lis che me à tout dant con gaissa sal Vera».

«No ve contaron dut - **disc amò Alberta Rossi** – ma **sarà Lis enstessa a ge rejonèr a la jent** con n message a la popolazion acioche la capacità de se mareveèr e de vardèr via i valores del passà no la vegne perduda, dessema ence ai recorc e a la testimonianzes. **Ve speton duc sal Vera ta Penia**».

Chi che vel pel jir su a pé coi gropes vidé dal Cai Sat Auta Val de Fascia. Se se troa aló dal festil te piaz de Penia o aló dal piaz dai auti te Ciantrujan: da la una e da mesa les cater.

Per se prenotèr, tant per l spetacol che per jir su col grop vidà dal Cai Sat, chiamèr ite l numer 0462 764267 (ence Whatsapp) ti oraries de ofize dant dai 8 de otober.

(AR/sr)